



ԼՂՀ դատական իշխանություն

ԱՆԱՀԻՏ ՄԱՆԱՅԱՆ

*ՀՀ սահմանադրական դատարանի նախագահի ավագ խորհրդական,
ԵՊՀ իրավագիտության ֆակուլտետի
սահմանադրական իրավունքի ամբիոնի դոցենտ
իրավաբանական գիտությունների թեկնածու*

ԷԴԳԱՐ ՇԱԹԻՐՅԱՆ

*ԵՊՀ իրավագիտության ֆակուլտետի
սահմանադրական իրավունքի ամբիոնի դոցենտ
իրավաբանական գիտությունների թեկնածու*

**ԽՄԲԱՅԻՆ ՀԱՅՑԻ ԻՆՍՏԻՏՈՒՏՆ
ԱՆԳԼՈՍԱՔՍՈՆԱԿԱՆ ԵՎ ՄԱՅՐՑԱՄԱՔԱՅԻՆ
ԻՐԱՎԱԿԱՆ ՀԱՄԱԿԱՐԳԵՐՈՒՄ. ՀԱՄԵՄԱՏԱԿԱՆ
ՎԵՐԼՈՒԾՈՒԹՅՈՒՆ**



Խմբային հայցը մի քանի անձանց կամ անձանց անորոշ շրջանակի իրավունքների պաշտպանության բավական լայն կիրառություն ունեցող ինստիտուտներից է: Այն հնարավորություն է ընձեռում խմբի անդամներից մեկին կամ մի քանիսին հայց ներկայացնել՝ ներկայացնելով խմբի մյուս անդամների շահերը, առանց համապատասխան գործի դատական քննությանը նրանց մասնակցության¹: Խմբային հայցի հիմնական նախապայմանը շահերի ընդհանրությունն է²: Թեև ներկայումս «խմբային հայց» հասկացության սահմանման հարցում մասնագիտական գրականության մեջ միասնական մոտեցում չկա,

այդուհանդերձ, ընդհանուր առմամբ, ընդունելի է այն մոտեցումը, որի համաձայն եթե տվյալ գործով մի խումբ անձինք ունեն միևնույն շահը, ապա քննությունը կարող է սկսվել և, դատարանի կողմից այլ բան չնախատեսելու դեպքում, շարունակվել խմբի անդամների թվից մեկ կամ մեկից ավել անձանցով կամ ընդդեմ մեկ կամ մեկից ավել անձանց, որոնք գործում են որպես ամբողջ խմբի կամ խմբի՝ առանց դրա մեկ կամ մի քանի անդամների, լիազորված անձինք³: Խմբային հայցը հարկ է դիտարկել որպես դատավարական ինստիտուտ, որը թույլ է տալիս մեկ կամ մի քանի անձանց խմբի կամ անձանց անորոշ շրջա-



նակի իրավունքների պաշտպանության հայց ներկայացնել:

Խմբային հայցերի դասակարգումների հիմքում ընկած են մի շարք չափանիշներ: Այդ կապակցությամբ, հաշվի առնելով հայց ներկայացնող սուբյեկտներին, առանձնացվում են մասնավոր, հանրային և կազմակերպական խմբային հայցերը: Մասնավոր-իրավական խմբային հայցի ինստիտուտը ծնունդ է առել և առավել լայն տարածում ստացել ընդհանուր իրավունքի պետություններում: Այն բնորոշ է արդարադատության անգլոսաքսոնական համակարգին: Ընդունված է այն մոտեցումը, որի համաձայն՝ խմբային հայցն անձանց անորոշ շրջանակի իրավունքների պաշտպանության առավել արդյունավետ միջոց է ընդհանուր իրավունքի պետություններում⁴: Այս կապակցությամբ, համառոտ անդրադառնալով ԱՄՆ-ում գործող իրավակարգավորումներին: ԱՄՆ քաղաքացիական դատավարության դաշնային կանոններին համապատասխան՝ խմբի մեկ կամ մի քանի անդամներ կարող են հայց ներկայացնել կամ ըստ հայցի հանդես գալ պատասխանողի դեմ՝ որպես ամբողջ խմբի ներկայացուցիչներ այն դեպքերում, եթե խումբն այնքան բազմամարդ է, որ դրա բոլոր անդամների մասնակցությունը գործի քննությանը բարդություն է ներկայացնում, իրավունքի և փաստերի հարցերն ընդհանուր են ամբողջ խմբի համար, պահանջները կամ առարկությունները բնորոշ են խմբի բոլոր անդամներին և կողմերի ներկայացուցիչներն ունակ են արդարացիորեն և համարժեքորեն պաշտպանել խմբի շահերը (կանոն 23)⁵: ԱՄՆ-ում խմբային հայցերի ինստիտուտի կիրառության ոլորտները բավական լայն են (տրանսպորտային միջոցների (օդանավեր, գնացքներ և այլն) վթարներ, կողմնակի ազդեցություն ունեցող դեղորայքի վաճառք, շրջակա միջավայրի աղտոտում, շինարարության ոլորտում վնասակար նյութերի օգտագործում և այլն): Հարկ է նկատել, որ ԱՄՆ-ում խմբային հայցի կիրառությունը շարունակում է մնալ քաղաքացիական դատավարության առավել խնդրահարույց հարցերից մեկը: Սույն ոլորտում օրենսդրությունը հաճախ է ենթարկվում փոփոխությունների: Այսպես, 2005 թվականին ընդունված ակտով (Class Action Fairness Act) սահմանափակվեց խմբային հայցերի կիրառության

հնարավորությունը⁶: Դրանով դաշնային դատարաններին վերապահվեց վեճեր քննելու իրավասություն այն խմբային հայցերով, որոնց գումարը գերազանցում է 5 միլիոն ԱՄՆ դոլարը, իսկ խմբի անդամների նվազագույն թիվը 100 է⁷: Խմբային հայցի ամերիկյան ինստիտուտի զարգացումը վկայում է նշված գործերով դատական քննության բոլոր ասպեկտների առավել խիստ իրավական կանոնակարգման մասին՝ ի համեմատ 1938 թվականի Քաղաքացիական դատավարության կանոններով սահմանված «ազատական» մոդելի⁸:

Մասնավոր խմբային հայցի ինստիտուտը բավական լայն տարածում է ստացել նաև անգլոսաքսոնական իրավական համակարգի այլ պետություններում (Մեծ Բրիտանիա, Կանադա, Ավստրալիա և այլն):

Մայրցամաքային իրավունքի պետություններում մասնավոր խմբային հայցի ինստիտուտը ներդրվեց 20-րդ դարի վերջերին (օրինակ՝ Նիդեռլանդներում՝ 1994 թվականին, Պորտուգալիայում՝ 1995 թվականին): Եվրոպական որոշ պետություններում սույն ինստիտուտը օրենսդրական ամրագրում ստացավ ավելի ուշ (օրինակ՝ Իսպանիայում՝ 2001 թվականին, Շվեդիայում՝ 2002 թվականին): Շվեդիայում «Խմբային հայցերի մասին» օրենքի (Groupe Proceedings Act)⁹ ընդունմամբ, իրավական ամրագրում ստացան ինչպես մայրցամաքային, այնպես էլ ընդհանուր իրավունքի պետություններին հայտնի անձանց խմբի կամ անձանց անորոշ շրջանակի իրավունքների պաշտպանության գրեթե բոլոր եղանակները: Կոլեկտիվ վեճերի լուծման շվեդական մոդելն ընդօրինակեցին նաև սկանդինավյան մյուս պետությունները՝ Ֆինլանդիան, Նորվեգիան և Դանիան¹⁰: Վերոնշյալ օրենքի 1-ին հոդվածի համաձայն՝ խմբային հայցը հայցվորը դատարան է ներկայացնում մի քանի անձանց անունից, ովքեր տվյալ գործով հանդես չեն գալիս որպես կողմ, սակայն որոնց համար նշված հայցն առաջ է բերում իրավական հետևանքներ: Մասնավոր խմբային հայցը կարող է ներկայացվել քաղաքացիների կամ իրավաբանական անձանց կողմից, որոնց համար ամբողջությամբ ընդունելի են հայցի առարկան և հիմքը (հոդ. 4): Կազմակերպական խմբային հայց կարող է ներկայացվել արտաբնույշտա-



ԼՂՀ դատական իշխանություն

յին հասարակական կազմակերպության կողմից՝ ի պաշտպանություն սպառողների շահերի կամ շրջակա միջավայրի (հոդ. 5): Վերջապես, հանրային խմբային հայց ներկայացվում է Շվեդիայի կառավարության կողմից որոշված իշխանության մարմնի կողմից (հոդ. 6):

Հարկ է նկատել, որ մայրցամաքային իրավունքի մի շարք պետություններում մասնավոր խմբային հայցերի ինստիտուտի հանդեպ վերաբերմունքը միանշանակ չէ: Օրինակ՝ Ֆրանսիան, Գերմանիան և Իտալիան ձեռնպահ են մնացել մասնավոր խմբային հայցերի անգլոսաքսոնական ինստիտուտի ընդօրինակումից: Վերջինիս յուրօրինակ այլընտրանք են դարձել հանրային և կազմակերպական խմբային հայցերը: Ընդ որում, մայրցամաքային խմբային հայցերը վերաբերելի են հասարակական հարաբերությունների ոչ բոլոր, այլ՝ որոշակի ոլորտներին: Դրանցից են, օրինակ, արժեթղթերի և սպառողական շուկաները, շրջակա միջավայրի պահպանությունը և այլն: Այս կապակցությամբ, Եվրոպական հանձնաժողովի կողմից ընդունվել են մի շարք հանձնարարականներ՝ Եվրոպական միությունում անձանց մեծաթիվ խմբերի իրավունքների պաշտպանության դատավարական կառուցակարգերի կիրառության հարցերով: Դրանցից է, օրինակ, Եվրոպական միության հակամենաշնորհային օրենսդրության պահանջների խախտման դեպքերում վնասի հատուցման հայցերի կիրառության վերաբերյալ հանձնարարականը (White Paper on damages actions for breach of the EC antitrust rules¹¹), որով առաջարկվում է օգտագործել անձանց մեծաթիվ խմբերի իրավունքների պաշտպանության երկու եղանակներ՝ լիազորված անձանց՝ սպառողների և առևտրային կազմակերպությունների միությունների կողմից ներկայացվող ներկայացուցչական հայցեր՝ ի պաշտպանություն ինչպես որոշակի, այնպես էլ անորոշ շրջանակի տուժած անձանց իրավունքների և տուժած անձանց մեծաթիվ խմբի մասնակիցների կողմից ներկայացվող խմբային հայցեր՝ ի պաշտպանություն իրենց, ինչպես նաև խմբի մյուս մասնակիցների շահերի, ովքեր տվել են իրենց համաձայնությունը որպես մասնակից միանալու խմբային հայցով դատական քննությանը¹²: Դրա հետ մեկտեղ, նշված իրա-

վական կառուցակարգերից և ոչ մեկը չպետք է խոչընդոտի մեծաթիվ խմբի մասնակիցների անհատական հայցով դատարան դիմելու իրավունքի իրացմանը:

Հարկ է նկատել, որ Եվրոպական հանձնաժողովի կողմից առաջարկված ներկայացուցչական հայցի ներկայացման կառուցակարգի հետ կապված, գոյություն ունեն երկու հնարավոր սկզբունքներ՝ ընտրություն՝ հօգուտ խմբի կազմից դուրս գալու (opt-out) և ընտրություն՝ հօգուտ խմբին միանալու (opt-in): Առաջին սկզբունքով առաջնորդվելու դեպքում, խմբային հայցով գործի քննությունը ենթադրում է, որ մեծաթիվ խմբի պոտենցիալ մասնակիցներին տրամադրվում է որոշակի ժամանակ՝ խմբի կազմից դուրս գալու վերաբերյալ հայտարարություն անելու համար: Հակառակ դեպքում, գործով ընդունվող որոշումը կտարածվի նրանց վրա՝ անկախ իրենց ցանկությունից: Երկրորդ սկզբունքով առաջնորդվելու դեպքում խմբի գործով որոշումը տարածվում է խմբի միայն այն մասնակիցների վրա, ովքեր ժամանակին ծանուցում են դատարանին խմբային հայցով ներկայացվող պահանջներին իրենց միանալու մասին: «Opt-in» մոդելը կիրառվում է Եվրոպական միության անդամ այն պետություններում, որտեղ օրենսդրորեն նախատեսված է կոլեկտիվ փոխհատուցման հնարավորությունը: «Opt-out» մոդելը կիրառվում է Պորտուգալիայում, Բուլղարիայում, Նիդեռլանդներում և Դանիայում¹³:

Եվրոպական հանձնաժողովի մեկ այլ հանձնարարականով, որը վերաբերում է սպառողներին խմբային փոխհատուցում տալուն (Green Paper on Consumer Collective Redress¹⁴), սահմանված են Եվրոպական միության տարբեր պետություններում սպառողների իրավունքների պաշտպանության հնարավոր եղանակները: Այս առումով, Եվրոպայում խմբային հայցերի կիրառության նպատակը սպառողների իրավունքների պաշտպանության առավել բարձր մակարդակի ապահովումն է՝ եվրոպական տարբեր պետությունների միջև սպրանքաշրջանառության ծավալների ավելացման նպատակով:

Եվրոպական միությունում ընդունվել է Սպառողների շահերի պաշտպանության մասին դիրեկտիվը, որով ևս խմբային հայցերի ներկայացման իրավունք է վերապահված



սպառողների միություններին¹⁵:

Սպառողների իրավունքների պաշտպանությանն ուղղված խմբային հայցեր ներկայացնելու հնարավորություն է նախատեսված Ֆրանսիայի օրենսդրությամբ: Այստեղ տարբեր միություններ օժտված են հանրային և խմբային շահերի պաշտպանությանն ուղղված հայցեր ներկայացնելու իրավունքով՝ նշված միությունների մեջ մտնող կազմակերպությունների գործունեության կապակցությամբ¹⁶: Գերմանիայում, «Ընդդեմ անբարեխիղճ մրցակցության» օրենքին¹⁷ համապատասխան, սպառողների միություններն իրավունք ունեն խմբային հայց ներկայացնել՝ որպես անբարեխիղճ մրցակցություն որակվող գործողությունների հետևանքով սպառողներին պատճառված վնասի հատուցման պահանջով: Սպառողների իրավունքների պաշտպանությամբ զբաղվող կազմակերպությունները կամ դրանց միությունները խմբային հայցերի ներկայացման իրավունքով են օժտված նաև Իտալիայում¹⁸, Բելգիայում, Նիդեռլանդներում¹⁹, Պորտուգալիայում²⁰ և եվրոպական այլ պետություններում:

Առավել հանգամանալից անդրադառնանք խմբային հայցերի ինստիտուտին վարչական արդարադատության ոլորտում ինչպես ընդհանուր, այնպես էլ մայրցամաքային իրավունքի մի շարք պետություններում: Ամերիկայի Միացյալ Նահանգներում պետության հետ վեճերում խմբային հայցերի կիրառության համատեքստում հարկ ենք համարում անդրադառնալ վարչական արդարադատության ամերիկյան համակարգի առանձնահատկություններին: Այստեղ էական դերակատարություն ունեն գործադիր իշխանությանը դասվող կվազիդատական բնույթի տարբեր ստորաբաժանումները, և վեճերը կարող են լուծվել առանց դատարան դիմելու: Դրա հետ մեկտեղ, օրենսդրորեն նախատեսված է պետության գործողությունները դատական կարգով բողոքարկելու հնարավորությունը: Դաշնային դատարաններն օժտված են առաջնային իրավասությամբ բոլոր այն հայցերով, որոնք ուղղված են պետական ծառայողներին կամ գերատեսչություններին հայցվորի հանդեպ ստանձնած պարտականությունների կատարմանը հարկադրելուն²¹: Նկատենք, որ ԱՄՆ-ում տևական ժամանակ պետական որևէ գերատեսչության դեմ հայցի

ներկայացումը բավական բարդ էր, քանզի դաշնային կառավարությունը՝ լայն առումով, օժտված է ինքնիշխան իմունիտետով²²: Վերջինիս էությունը կայանում է նրանում, որ համընդհանուր ճանաչում ստացած դիրքորոշման համաձայն՝ ընդդեմ Միացյալ Նահանգների դատական որևէ գործընթաց չի կարող սկսվել և ընթանալ²³: Վերոնշյալ իմունիտետն առ այսօր տեղ-տեղ հանդես է գալիս որպես «բացարձակ խոչընդոտ» ընդդեմ դաշնային կառավարության հայցեր ներկայացնելու ճանապարհին»²⁴: Այդուհանդերձ, ԱՄՆ-ում ներկայումս գործում են մի քանի օրենսդրական ակտեր, որոնք թույլ են տալիս հաղթահարել այն: Դրանցից են, մասնավորապես, «Վարչական ընթացակարգի մասին» օրենքը (The Administrative Procedure Act), Թաքերի օրենքը (The Tucker Act) և «Դաշնային մակարդակում դեյիկտային հայցերի մասին» օրենքը (Federal Tort Claims Act): Հատկանշական է, որ վերը հիշատակված օրենքներից առաջինը նախատեսում է միայն այնպիսի հայցեր ներկայացնելու հնարավորություն, որոնք չեն վերաբերում նյութական վնասի հատուցմանը՝ բովանդակելով մի շարք այլ վերապահումներ: Ուստի՝ մանրամասն անդրադառնանք «Դաշնային մակարդակում դեյիկտային հայցերի մասին» 1948 թվականի օրենքի դրույթներին, որոնցով նախատեսված է Միացյալ Նահանգներին պատասխանատվության ենթարկելու հնարավորություն սեփականության փչացման կամ կորստի, ֆիզիկական վնասի կամ մահվան համար՝ պայմանավորված պաշտոնատար անձի անփութ կամ ապօրինի գործողությամբ (անգործությամբ)՝ իր պաշտոնական լիազորություններն իրականացնելիս²⁵: Սույն օրենքով նախատեսված են պետությանը պատասխանատվությունից ազատելու երեք հիմքեր՝ պայմանավորված այնպիսի իրադարձություններով, որոնք հնարավոր չէ կանխել (այսպես կոչված “Feres Doctrine”): Դրանք են զինծառայողների կողմից՝ զինվորական պարտականությունների կատարմամբ պայմանավորված վիրավորում ստանալու, հայեցողական լիազորությունների իրականացման դեպքերը, ինչպես նաև միջազգային բնույթի դեյիկտները (օրենքի գործողության հետ կապված լրացուցիչ սահմանափակումները վերաբերում են այնպիսի ոլորտների,



ինչպիսիք են, օրինակ, դրամական համակարգի կարգավորումը, փոստային ծառայությունների մատուցումը և այլն)²⁶: Նախ՝ պահանջների ներկայացման համար ելակետային դարձած պատահարից հետո, երկու տարվա ընթացքում անձը պարտավոր է կապ հաստատել համապատասխան գերատեսչության հետ՝ վերջինիս ներկայացնելով իր պահանջները: Եթե դրան հաջորդող վեցամսյա ժամկետում գերատեսչությունը նրան տեղեկացնի իր պահանջների մերժման մասին, ապա վերջինս նույն ժամկետում պետք է դիմի դատարան²⁷:

Այսպիսով, ԱՄՆ օրենսդիրը «կանաչ լույս է վառել» ինչպես խմբային, այնպես էլ անհատական հայցերի առջև, սակայն խստագույն կանխորոշված ծավալներով, որոնք կոնկրետացված են առանձին օրենսդրական ակտերով: Այս կապակցությամբ, չեն բացառվում այնպիսի իրավիճակները, երբ արդյունավետ խմբային կամ անհատական հայցի ներկայացումը գործնականում հնարավոր չի լինի: Օրինակ՝ նման իրավիճակ առաջացավ 2005 թվականին Նոր Օռլեանում՝ կապված «Քաթրինա» փոթորիկից տուժած անձանց կողմից ներկայացված հայցի հետ: Տվյալ դեպքում որպես պատասխանողներ պետք է հանդես գային ԱՄՆ ինժեներային զորքերը, որոնք ի գործը չեղան պաշտպանել քաղաքը տարերային աղետից: Գատաճող չընդունեց հայցը՝ գտնելով, որ զինվորական ինժեներներն օժտված են հայցերի հանդեպ իմունիտետով («Ջրեղեղների նկատմամբ վերահսկողության մասին» 1928 թվականի օրենքը նրանց, իրոք, օժտել էր իմունիտետով) և ինքը «սահմանափակված է օրենքի կադապարներով», թեև ուսադիրներով անձինք, իրոք, «աչք են փակել» քաղաքի պաշտպանության հարցի վրա²⁸:

Ավստրալիայում խմբային հայցերի ինստիտուտը (պաշտոնական անվանումն է՝ “representative proceedings”) օրենսդրական ամրագրում ստացավ 1990-ական թվականների սկզբին: Ընդ որում, այս կապակցությամբ բոլոր անկյունաքարային դրույթներն արտացոլված են «Գաշնային դատարանակազմության մասին» օրենքով (Federal Court of Australia Act 1976, IVA): Վերոնշյալ ինստիտուտն օրենսդրական մակարդակում ամրագրելու տրամաբանության հիմքում ընկած

էին երկու հիմնական նպատակներ: Դրանցից առաջինը դատական պաշտպանության իրական միջոց նախատեսելու անհրաժեշտությունն էր այն դեպքերում, երբ թեև շուտափույժ են բազմաթիվ անձանց շահերը, և վիճելի հարցի գինը բարձր է, այդուհանդերձ, նրանցից յուրաքանչյուրին պատճառված վնասն էական չէ և այն հատուցելը անհատական հայց ներկայացնելու միջոցով նպատակահարմար չէ: Այսինքն՝ նման քայլով նախատեսվեց արդարադատության մատչելիություն հասարակության այն անդամների համար, որոնց ավելի վաղ նման հնարավորություն փաստացի չէր ընձեռնվել հայցերի «թանկության» պատճառով: Վերը նշված օրենքի ընդունման երկրորդ նպատակն այնպիսի իրավիճակների կանոնակարգումն էր, երբ պատճառված վնասի համար յուրաքանչյուր հայցվորի կողմից պահանջվող նյութական հատուցման չափը բավական մեծ է, և, միաժամանակ, առկա են պատասխանողից հատուցում պահանջող բազմաթիվ հայցվորներ: Օրենքի ընդունմամբ անձանց խմբերի համար նախատեսվեց փոխհատուցում ստանալու ավելի մատչելի և արդյունավետ հնարավորություն²⁹: Ավստրալիայում գործող իրավակարգավորումներին համապատասխան՝ խմբային հայցերով դատական քննություն սկսելու համար անհրաժեշտ է պահպանել օրենսդրական մի շարք պահանջներ: Դրանք են՝ ընդդեմ միևնույն անձի պահանջներ ներկայացնող յոթ կամ ավելի անձանց առկայությունը, բոլոր պահանջների բիսելը նույնատիպ կամ միմյանց հետ կապված հանգամանքներից, բոլոր պահանջներից իրավական բնույթի էական և ընդհանուր առարկությունների և վիճելի հարցերի ծնունդ առնելը³⁰: Հայցադիմումում պետք է նշվեն խմբի անդամների մասին տեղեկություններ, կոնկրետացվեն խմբի անունից ներկայացվող պահանջները, ինչպես նաև խմբի անդամների համար ընդհանուր իրավունքի հարցերը և փաստական հիմքերը: Օրենքը հնարավորություն է ընձեռում դատական գործընթացը նախաձեռնած հայցվորին հաշտության համաձայնության գալ պատասխանողի հետ, սակայն այդպիսի համաձայնության բովանդակությունը և պայմանները պարտադիր կարգով պետք է ներկայացվեն դատարանին: Ավելին, գործի քննության ցանկացած փու-



լում հայցվորը կարող է նաև բացառապես անհատական կարգով հատուցում ստանալ: Նշված դեպքում նրան կարող է փոխարինել խմբի այլ անդամ՝ համապատասխան դիմում ներկայացնելով դատարան³¹:

Խնդրո առարկայի հետ կապված, հետաքրքրական են Ռուսաստանի Դաշնության օրենսդրությամբ նախատեսված իրավակարգավորումները: ՌԴ վարչական դատավարության օրենսգրքի³² 42-րդ հոդվածով ամրագրված է անձանց խմբի կողմից վարչական խմբային հայցադիմումով դատարան դիմելու հնարավորությունը: Ըստ այդմ, վարչական կամ հանրային այլ հարաբերությունների մասնակից հանդիսացող քաղաքացիները, ինչպես նաև այլ անձինք՝ օրենքով նախատեսված դեպքերում, իրավունք ունեն անձանց խմբի խախտված կամ վիճարկվող իրավունքների և օրինական շահերի պաշտպանությանն ուղղված խմբային հայցադիմում ներկայացնել դատարան: Ընդ որում, դատարան դիմելու համար հիմք է հանդիսանում այնպիսի պայմանների առկայությունը, ինչպիսիք են անձանց խմբի մեծաթիվությունը կամ խմբի անդամների թվի աճորոշ լինելը, ինչը բարդացնում է խմբի պոտենցիալ անդամների պահանջներին լուծում տալու գործընթացն անհատական կարգով և մի քանի հայցվորների կողմից վարչական հայցադիմումի համատեղ ներկայացման կարգով, վեճի առարկայի և խմբի անդամների կողմից համապատասխան պահանջների ներկայացման հիմքերի նույնարժեք լինելը, վարչական գործով ընդհանուր պատասխանողի (համապատասխանողների) առկայությունը, ինչպես նաև խմբի բոլոր անդամների կողմից իրենց իրավունքների պաշտպանության միևնույն եղանակի օգտագործումը: Հատկանշական է, որ նման վարչական գործերը դատարանի կողմից քննության են առնվում այն դեպքում, եթե անձանց խմբի իրավունքների և օրինական շահերի պաշտպանության վերաբերյալ պահանջ ներկայացրած անձի կողմից դատարան դիմելու օրվա դրությամբ նշված պահանջին են միացել ոչ պակաս, քան քսան անձինք: Դա տեղի է ունենում վարչական հայցադիմումը ստորագրելու կամ հայցադիմումին միանալու մասին առանձին գրավոր հայտարարություն ներկայացնելու եղանակով: Խմբային հայցադիմումում պետք է

նշվեն այն անձը կամ անձինք, ում հանձնարարված է համապատասխան վարչական գործի վարումը՝ ելնելով անձանց խմբի շահերից: Ընդ որում, նշված անձը կամ անձինք գործում են առանց լիազորագրի, օգտվում են հայցվորների իրավունքներից և կրում նրանց դատավարական պարտականությունները: Դատարանի վարույթում գտնվող վարչական խմբային հայցադիմումում նշված պահանջին համահունչ պահանջ բովանդակող հայցադիմումով ևս մեկ անձի՝ դատարան դիմելու դեպքում, դատարանն առաջարկում է նրան միանալ խմբային հայցադիմումին: Եթե նշված անձը միանում է անձանց խմբի կողմից ներկայացված պահանջին, ապա դատարանը միավորում է ներկայացված և ավելի վաղ ընդունված պահանջները: Հակառակ դեպքում, դատարանը կասեցնում է նրա հայցադիմումով գործի քննությունը՝ մինչև անձանց խմբի իրավունքների և օրինական շահերի պաշտպանության վերաբերյալ վարչական գործով որոշում կայացնելը:

Ֆրանսիայում, խմբային հայցը՝ որպես կոլեկտիվ շահերի պաշտպանության դատավարական միջոց, իրավակիրառ պրակտիկայում գոյություն է ունեցել դեռևս 20-րդ դարի սկզբներին: 1913թ. Ֆրանսիայի Վճռաբեկ դատարանի կողմից քննված գործերից մեկով որպես հայցվոր էր հանդես գալիս գյուղատնտեսական արտադրանքի արտադրողների մի կոլեկտիվ, որոնք միավորվել և հայց էին ներկայացրել իրենց իրավունքների և օրինական շահերի պաշտպանության նպատակով:

1973թ. դեկտեմբերի 27-ին ընդունվեց օրենք, որով նախատեսվեց կոլեկտիվ շահերի պաշտպանությանն ուղղված հայց ներկայացնելու հնարավորություն և սահմանվեցին այն հիմքերը, որոնց պարագայում հնարավոր էր խմբային հայց ներկայացնել:

Ֆրանսիայի դատավարական օրենսդրության ուսումնասիրությունը հիմք է տալիս եզրակացնելու, որ կոլեկտիվ իրավունքների պաշտպանությանն ուղղված հայցը կարող է ներկայացվել օրենքով ուղղակիորեն նախատեսված հետևյալ դեպքերում՝

1. Կոլեկտիվ շահերի պաշտպանությանն ուղղված հայցը կարող է ներկայացվել սպառողների միավորումների կողմից: Ինչպես նշեցինք, հիշյալ հայցի օրենսդրական կարգավորումը սկիզբ է առնում 1973թ. ընդունված



օրենքից: Հետագայում՝ 1993թ. օրենքը կողմ-
ֆիկացվեց սպառողների շահերի պաշտպա-
նությանն ուղղված առանձին օրենսգրքում,
որն ամրագրեց այն կազմակերպությունների
իրավական վիճակը, որոնք օժտված են կո-
լեկտիվ շահերի պաշտպանությանն ուղղված
հայց ներկայացնելու հնարավորությամբ:

Սպառողների օրենսգրքի հոդված Լ. 421-
7-ի համաձայն՝ կոլեկտիվ շահերի պաշտպա-
նության նպատակով հայց ներկայացնելու
համար անհրաժեշտ նախապայմաններն են՝
1) վնասը պետք է պատճառված լինի քրեորեն
պատժելի արարքով, 2) այն պետք է ներկա-
յացվի հակաիրավական արարքի դադարեց-
ման նպատակով, 3) այն ներկայացվում է
պայմանագրի այն պայմանները բացառելու
նպատակով, որոնք խախտում են սպառողնե-
րի իրավունքները: Կոլեկտիվ շահերի պաշտ-
պանությանն ուղղված հայցի միջոցով դա-
տական պաշտպանության իրավունքի առա-
ջացման համար բավարար է հիշյալ պայման-
ներից մեկի առկայությունը:

2. Կոլեկտիվ շահերի պաշտպանությանն
ուղղված հայց կարող է ներկայացվել բնակ-
չության առողջության պաշտպանության մի-
ավորումների կողմից: Բնակչության առող-
ջության մասին օրենսգրքի հոդված Լ.1114-2-
ի համաձայն՝ բնակչության առողջության
պաշտպանության ասոցիացիաները կարող
են կոլեկտիվ շահերի պաշտպանության հայց
ներկայացնել առողջապահության համա-
կարգի կազմակերպությունների ծառայու-
թյունների կողմից սպառողների կոլեկտիվ
շահերի ուղղակի կամ անուղղակի խախտում-
ների դեպքում:

3. Ֆրանսիայի «Շրջակա միջավայրի
պաշտպանության մասին» օրենսգիրքը կո-
լեկտիվ շահերի պաշտպանությանն ուղղված
հայց ներկայացնելու հնարավորություն է նա-
խատեսում շրջակա միջավայրի պաշտպա-
նության մասին օրենսդրությամբ նախատես-
ված կոլեկտիվ իրավունքների ուղղակի կամ
անուղղակի խախտումների համար:

Ֆրանսիայի օրենսդրության վերլուծու-
թյունը հիմք է տալիս եզրակացնելու, որ խմ-
բային հայցերի միջոցով դատական պաշտ-
պանության իրավունքի իրացումը հնարավոր
է հիշյալ կոլեկտիվ իրավունքների և օրինա-
կան շահերի պաշտպանության համար³³:

Խոսելով Գերմանիայում խմբային հայցե-

րին առնչվող իրավակարգավորումների մա-
սին, հարկ է նկատի ունենալ, որ չնայած բազ-
մաթիվ առաջարկություններին՝ վերջինս նույ-
նությամբ չի փոխառել խմբային հայցերի
անգլոսաքսոնական ինստիտուտը՝ ամրագ-
րելով հիշյալ հայցերի յուրօրինակ այլընտ-
րանքային տարբերակ՝ կազմակերպու-
մաների խմբային հայցերը:

Հարկ է նկատել, որ կազմակերպություն-
ների խմբային հայցերի միջոցով դատական
պաշտպանության հնարավորությունն նախա-
տեսող առաջին ակտը Գերմանիայում ըն-
դունվել է դեռևս 100 տարի առաջ:

Գերմանացի իրավագետները, ընդունե-
լով, որ ամերիկյան խմբային հայցի ինստի-
տուտը հետաքրքիր իրավական գործիք է,
մինևույն ժամանակ կասկածանքով են վերա-
բերվում այն գերմանական իրավական հա-
մակարգ ներմուծելու գաղափարին³⁴:

Գերմանիայում ընդունվել են մի քանի
նորմատիվ ակտեր, որոնք հնարավորություն
են տալիս տարատեսակ միավորումներին և
կազմակերպություններին ներկայացնելու
խմբային հայցեր: Մասնավորապես, անբա-
րեխիղճ մրցակցության դեմ պայքարի մասին
օրենքի փոփոխությունները սպառողների մի-
ավորումներին հնարավորություն տվեցին
խմբային հայցեր ներկայացնել անբարեխիղճ
մրցակցություն որակվող գործողությունների
արդյունքում պատճառված վնասի հատուց-
ման առնչությամբ³⁵:

2002թ. «Շրջակա միջավայրի պաշտպա-
նության մասին» դաշնային օրենքով նախա-
տեսվեց շրջակա միջավայրի պաշտպանու-
թյան կազմակերպությունների կողմից հայց
ներկայացնելու միջոցով հիշյալ բնագավառի
օրենսդրությամբ ամրագրված պայմանների
ու պահանջների պահպանմանը հարկադրե-
լու հնարավորություն: Հիշյալ միավորումների
կողմից հայց ներկայացնելու իրավունքը
սահմանափակվում է դատական արգելքի վե-
րաբերյալ դատական որոշում ընդունելու պա-
հանջով և հնարավորություն չի տալիս դա-
տական կարգով քննարկելու առանձին ան-
ձանց պատճառված անհատական վնասի
հատուցման հարցը³⁶:



1. Sh'u Clermont K. M. *Principles of Civil Procedure*. St. Paul, 2005, էջ 386:
2. Sh'u Елисеев Н. Г. *Гражданское процессуальное право зарубежных стран*, М., 2006, էջ 495:
3. Sh'u Пучинский В. К. *Гражданский процесс зарубежных стран*, М., 2007, էջ 153:
4. Sh'u Оскаве К. *Классовый иск в современном американском гражданском процессе // Защита прав и законных интересов граждан и организаций: материалы Международной научно-практической конференции. Сочи, Ч. 1, 2002, N 3, էջեր 69-81:*
5. Sh'u *Federal Civil Judicial Procedure and Rules, 2004 Revised Edition*. St. Paul, 2004, էջեր 121-122:
6. Sh'u Resnik J. *Whither and Whether Adjudication? // Boston University Law Review, 2006, N 86, էջ 1125:*
7. Sh'u Spencer B. A. *Civil Procedure. A Contemporary Approach*. St. Paul, 2007, էջ 565:
8. Sh'u Subrin S. N., Minow M. L., Brodin M. S., Main T. O. *Civil Procedure: Doctrine, Practice and Context*. New York, 2008, էջ 928:
9. Հարկանշական է, որ վերոնշյալ օրենքի մշակման գործընթացը չափազանց երկարատև էր՝ ավելի քան 10 տարի: Օրենքն ուժի մեջ է 2003 թվականի հունվարի 1-ից:
10. Sh'u Hodges C. *Europeanisation of Civil Justice: Trends and Issues // Civil Justice Quarterly, 2007, Vol. 26. January, էջ 118:*
11. COM (2008) 165 final of 2 April 2008:
12. Մամուլային տեղեկություններ ec.europa.eu/.../antitrust/actions/damages/white...
13. Մամուլային տեղեկություններ "Towards a European Horizontal Framework for Collective Redress", COMMUNICATION FROM THE COMMISSION TO THE EUROPEAN PARLIAMENT, THE COUNCIL, THE EUROPEAN ECONOMIC AND SOCIAL COMMITTEE AND THE COMMITTEE OF THE REGIONS, Brussels, XXX COM(2013) 401/2, 3.2-3.4, ec.europa.eu/justice/.../com_2013_401_en.pdf:
14. Brussels, 27 November 2008, COM (2008) 794 final:
15. Sh'u Directive 2009/22/EC of the European Parliament and of the Council of 23 April 2009 on injunctions for the protection of consumers' interests: Այս կապակցությամբ, տեղեկություններ DIRECTIVE OF THE EUROPEAN PARLIAMENT AND OF THE COUNCIL on certain rules governing actions for damages under national law for infringements of the competition law provisions of the Member States and of the European Union, Brussels, 24 October 2014, adopted by the Council on 10 November 2014:
16. Sh'u Jolowicz J. A. *On Civil Procedure*, 2000, էջ 77:
17. Sh'u Gesetz gegen den unlauteren Wettbewerb (UWG), 2004).
18. Sh'u [http://www.italia-ru.it/node/9310:](http://www.italia-ru.it/node/9310)

19. Sh'u Hodges C. *Multy-Party Actions: A European Approach*, էջ 323:
20. Sh'u Hodges C. *Europeanisation of Civil Justice: Trends and Issues // Civil Justice Quarterly, 2007, Vol. 26. January, էջ 115:*
21. Sh'u 28 USC. « 1361. *Action to compel an officer of the United States to perform his duty*, <http://www.law.cornell.edu/uscode/28/1361.html>:
22. Մամուլային տեղեկություններ U. G. C. Sisk, M. F. Noone, J. Montague Steadman, U. A. Lester. *Litigation with the federal government*, էջեր 333-334:
23. Sh'u E. Chemerinsky. *Against Sovereign Immunity// Stanford Law Review, Vol. 53, No. 5, May, 2001, էջ 1204:*
24. Sh'u A. Hill. *In Defense of Our Law of Sovereign Immunity// Boston College Law Review, Vol. 42, Issue 3, No. 3, էջ 488:*
25. Sh'u Օրենքի § 1346. *United States as defendant*, http://www.law.cornell.edu/uscode/uscode28/usc_sec_28_00001346----000-.html:
26. Sh'u *Federal Tort Claims Act// CRS Report for Congress, December 11, 2007, էջ 2*, <http://www.fas.org/sgp/crs/misc/95-717.pdf>:
27. Sh'u նույն տեղեկություններ:
28. Sh'u E. Blass. *Katrina flooding lawsuit dismissed// USA Today 1/30/2008*, http://www.usatoday.com/news/nation/2008-01-30-katrina-lawsuit_N.htm:
29. Sh'u Dr Vince Morabito. *Corporate Accountability, Third Parties and Class Actions, Working Paper No. 3, 2006, էջ 3*, <http://www.buseco.monash.edu.au/blt/wclrg/working-paper-3.pdf>:
30. Sh'u *Federal Court of Australia Act 1976, sec. 33C*, http://www.austlii.edu.au/au/legis/cth/consol_act/fcoaa1976249/s33c.html:
31. Sh'u նույն տեղեկություններ, sec. 33H, 33V, 33W:
32. Sh'u "Кодекс административного судопроизводства Российской Федерации" от 08.03.2015 N 21-ФЗ: «*Ռուսաստանի Դաշնության վարչական դատարանային օրենսգրքը գործողության մեջ դնելու մասին*» 08.03.2015թ. N22-ՓՅ ՌԴ դաշնային օրենքին համապատասխան՝ օրենսգրքը գործողության մեջ է դրվել 2015 թվականի սեպտեմբերի 15-ից:
33. Черкасова Евгения Борисовна, ИСК В ЗАЩИТУ КОЛЛЕКТИВНЫХ ИНТЕРЕСОВ И ПРЕДСТАВИТЕЛЬСКИЙ ИСК ПО ЗАКОНОДАТЕЛЬСТВУ ФРАНЦИИ, [conf.sfu-kras.ru/mn2015/sites/.../files/.../черкас.do](http://conf.sfu-kras.ru/mn2015/sites/.../files/.../черкас.до)
34. Цвайгерт К., Кётец Х. *Введение в сравнительное правоведение в сфере частного права: в 2 т. Т. 1 / пер. с нем. М., 2000. С. 32.*
35. Дмитрий Ярославович Малешин, *Российская модель группового иска*, <http://www.szrf.ru/doc.phtml?nb=edition07&issid=2010004000&docid=20>:
36. Аболонин Г. *Массовые иски*, М., 2011, էջ 257-259: